

SCRIPT OF MORNING GOJRI NEWS BULLETIN 25SEP 1015 HRS

مارننگ گو جری نیوز بلیٹن مورخہ 25 ستمبر 2025

یوہ آکا شوانی جموں ہے عبیدالرحمان تیں خبر سُنو۔

LG NDC

لیفٹیننٹ گورنر منوج سنہا نے نیشنل ڈفنس کالج مانہہ چل رپیا ایک کورس غے دوران بھارتیہ فوج غا اعلیٰ افسران غا ویف تیں علاوہ عوامی خدمات تے دیگر حکام نال ملاقی ہویا اس گل بات غے دوران ایل جی موصوف نے کہی و کہ وزیر اعظم نریندر مودی غی قیادت مانہہ آپریشن سندور حالیہ تاریخ مانہہ بھارت غی دلیر فوج غو زبردست کارنامو ہے موصوف نے مزید کہیو کہ اگر مستقبل مانہہ بھارت ور کائے وی دہشت گردانہ حملو وے غو تے اُس حملہ نانہہ جنگ غو عمل سمجھیو جے گو تے اس حملہ گو منہ توڑ جواب دتو جے غو ایل جی موصوف نے مزید کہیو کہ بھارت غی طرفوں یاہ گل واضع کردتی گئی ہے کہ ملک نیوکلر دھمکی نانہہ وی پرداخت نہیں کرے غو تے دہشت گردان غا ٹھکاناں ور منصوبہ بند طریقہ نال حملہ کرتورے غو۔ اسے دوران بی جے پی غا قومی نائب صدر تے پارلیمانی کمیٹی مانہہ عوامی امور گا چئیرمین بھائی جنٹا جے پانڈا نے ممبر پارلیمان راجیہ سبھا ڈاکٹر کشن راو بھگت غے ہمراہ ایل جی موصوف نال ملاقات کی۔

DY CM PHARMACIST DAY

نائب وزیر اعلیٰ سریندر چوہدری نے گزشتہ روز جموں گا ایک نجی فارمیسی کالج مانہہ عالمی فارمیسیسٹ تہاڑہ گا سلسلہ مانہہ منعقدہ تقریبات غو افتتاح کیو اس دوران تقریب مانہہ موجود افراد نال خطاب غے دوران موصوف نے طبی دیکھ بھال مانہہ فارماسیسٹ گا کردار ور تبادلہ خیال کیو تے کالج غا طالب علمان نانہہ اس گل گو دھیان دوايو کہ مریض اُن تیں کس طرح غی اُمید رکھیں اس دوران موصوف نے دوائی فروشان تے ڈاکٹران غی خدمات غو ذکر کیو تے کووڈ وباء غے دوران طبعی عملہ غی طرفوں دتی گئی خدمات ور خراج عقیدت پیش کیو تے کہیو کہ جس وقت ہر آدمی نے اپنا آپ نانہہ گھراں غے اندر بند کرلیو تھو اُس وقت یہ لوگ خدمات انجام دے رہیا تھاوزیر موصوف نے طبعی نظام غے اندر فارماسیسٹ گا کردار غی وی سراہنا کی۔

RANA UNION MINISTER

جنگلات گا وزیر جاوید احمد رانان نے ماحولیات تے جنگلات گا مرکزی وزیر بوپیندر یادو نال نوی دہلی مانہہ ملاقات کی تے جموں کشمیر غے نادر جنگلات تے ماحولیاتی تبدیلی گا سنگین معاملات ور تبادلہ خیال کیو اس ملاقات غے دوران متعلقہ ادارہ غی بہتر صلاحیت سازی وستے مرکزی سرکار تے جموں کشمیر سرکار غو آپسی تعاون ماحول گی باز آبادکاری تے جنگلات تے ماحولیاتی پروگرامان غی عمل آوری ول تبادلہ خیال کیو گیو اس دوران وزیر موصوف نے مرکز غی طرفوں جنگلاتی اگ غا تحفظ تے منصوبہ بند سکیمان گے تحت دتا جان آلا مالی تعاون نانہہ واگزار کرنغو کہیو جس غی تفصیلی رپوٹ مالی سال 2024-25 وستے جمع کرائی گئی تھی جس غی لاگت 3 اشاریہ 5 کروڑ تھی۔

SATISH OIL COMPANIES

خوارک سیول سپلائی ت امور صارفین گا وزیر ستیش شرما نے گزشتہ روز تیل کمپنیاں گا نمائندگان نال میٹنگ غے دوران جموں کشمیر مانہ ایل پی جی غی دستیابی غو جائیزو لیو اس دوران موصوف نے پورا جموں کشمیر غے اندر ایل پی جی سلینڈر غی سپلائی نانہ یقینی بنان غی ہدایت کی تیل کمپنیاں غا نمائندگان نے وزیر موصوف نانہ یقین دوايو کہ ایل پی جی سلینڈراں غی سپلائی مانہ کوئی رُکاوت نہیں آئی تے عوامی سہولت خاطر ہر ممکن اقدامات کیا جارہیا ہیں اس دوران وزیر موصوف نے دیہی علاقوں غے اندر ایل پی جی سلینڈراں کی تقسیم کاری نانہ مزید بہتر بنان غی گل وی کی۔

CS TRIBAL SCHEMES

چیف سیکرٹری اٹل ڈلو نے گزشتہ روز جموں کشمیر غے اندر قبائلی طبقہ غی فلاح و بہبود وستے چلائی گئی بکھ بکھ مرکزی اسکیمیں گو جائیزو لیو اس دوران موصوف نے قبائلی بہبود منصوبہ غے تحت اخراجات نانہ بدھان غی ہدایت کی تے کہی و کہ آدی کرم یوگی ابھیان غے تحت گرائیں ایکشن منصوبہ نانہ تشکیل دتو جے موصوف نے اس گل ور وی زور پوی کہ فلاحی اسکیمیں غا فائداں نانہ بدھوں بدھ گُنبان توڑی پُجان خاطر متعلقہ محکمو موثر لائحہ عمل تیار کرے تاکہ ان فلاحی اسکیمیں غا فائداں ہر ایک قبائلی خاندان توڑی پچ سکے۔

SEVA PARV

پورا ملک غے اندر سیوا پرو تقریبات غا سلسلہ مانہ اج مودی سرکار گو دفاعی نظام غی مضبوطی مانہ کردار ور تبادلہ خیال کی وجے غو موڈی سرکار نے گزشتہ 11 براں گے اندر دفاعی نظام نانہ مضبوط تے جدید کرن ور خصوصی توجہ دتی ہے اس ضمن مانہ اپریل 2018 مانہ آئی ڈی ایس اقدام غی شروعات کی گئی جس غو مقصد دفاعی نظام نانہ جدید تکنیکیاں نال لحث کرنو تھو اس دوران 24 سو کروڑ روپیاں غی 43 اشیاء دفاعی فوج نے حاصل کی۔

GST REFORMS

جدید دور جی ایس ٹی تبدیلی غے تحت سرکار نے صنعتاں غے اندر استعمال ہون آلا پلانٹ جہڑا دھواں تے دیگر آلودگی نانہ صاف کریں اُن وٹیکس 12 فی صد تیں کہتا غے 5 فی صد کردتو گیو ہے اس عمل نال صنعتاں نانہ کافی فائدو حاصل وے غو تے صنعتاں غے نادر ماحول نانہ آلودگی تیں بچان وستے مزید بہتر طریقہ استعمال کیا جئیں غا جس نال صاف ستھرو ماحول تے صنعتی علاقوں گے اندر پائیداد ترقی نانہ یقینی بنایو جاسکے گو اسے طرح ماحول دوست تھیلاں ور وی جی ایس ٹی 12 فی صد تیں کہتا غے 5 فی صد کردتی گئی ہے تاکہ ہر کوئے ان نانہ استعمال کرسکے اسے طرح کساناں گا تعاون خاطر شمسی پمپ تے دیگر ہوا ور چلن آلی مشیناں ور وی وٹیکس 12 فی صد تیں کہتا غے 5 فی صد کیو گیو ہے۔
